

সামাজিক পরিবর্তন

Social Change



ভূমিকা : সমাজ একটি প্রবহমান নদীর মত। প্রতি মুহূর্তে এটি ছুটে চলে। এ ছুটে চলার মধ্য দিয়েই সমাজ পরিবর্তিত হয়। সামাজিক প্রথা, রীতিনীতি, মূল্যবোধ, সংস্কৃতি, সামাজিক কাঠামো পরিবর্তনশীলতার মধ্য দিয়ে সমাজ আজকের অবস্থানে উন্নীত হয়েছে। আজকের এ আধুনিক সমাজ মূলত অনিবার্য পরিবর্তনের ফসল। বস্তুত আদি হতে আজ পর্যন্ত সমাজ গতিশীল রয়েছে নানাবিধ পরিবর্তনের মধ্য দিয়ে। কোনো সমাজই স্থির নয়, বরং গতিশীল। তাই বলা হয়ে থাকে, মানব সমাজের ইতিহাস হচ্ছে পরিবর্তনের ইতিহাস। পরিবর্তন প্রতিটি সমাজের অপরিহার্য বৈশিষ্ট্য। তবে সামাজিক পরিবর্তনের গতি সব সমাজে এক নয়। আদিম সমাজের পরিবর্তনের সাথে আধুনিক সমাজের পরিবর্তনের বিস্তর পার্থক্য রয়েছে। আবার শিল্পায়িত নগর সমাজে যত দ্রুত পরিবর্তন সম্ভব গ্রামীণ কৃষি সমাজে তা সম্ভব নয়। উন্নত সমাজে পরিবর্তনের গতি অনেক বেশি। কিন্তু নিরক্ষর বা অপেক্ষাকৃত অনগ্রসর সমাজে সামাজিক পরিবর্তনের গতি অনেক মসৃণ। তবে পরিবর্তন হয় না এমন কোনো সমাজ নেই। এ ইউনিটে সামাজিক পরিবর্তন, এর কারণ ও প্রভাব সম্পর্কে আলোচনা করা হল।

	ইউনিট সমাপ্তির সময়	ইউনিট সমাপ্তির সর্বোচ্চ সময় ০৩ দিন
--	---------------------	-------------------------------------

এই ইউনিটের পাঠসমূহ

- পাঠ ১৪.১: সামাজিক পরিবর্তন
- পাঠ ১৪.২: সামাজিক পরিবর্তনের কারণসমূহ
- পাঠ ১০.৩: সামাজিক পরিবর্তনের প্রভাব

পাঠ-১৪.১ সামাজিক পরিবর্তন Social Change



উদ্দেশ্য

এই পাঠ অধ্যয়ন শেষে আপনি-

- সামাজিক পরিবর্তন বলতে কী বুঝায় তা বলতে পারবেন।



মুখ্য শব্দ

সামাজিক পরিবর্তন।



মৌলিক ধারণা (Basic Concept)

কোনো সমাজই স্থির নয়, বরং গতিশীল। গতিশীলতার মধ্য দিয়েই সামাজিক পরিবর্তন ত্বরান্বিত হয়। সামাজিক পরিবর্তন বলতে বুঝায় সমাজের একটি বিদ্যমান অবস্থা থেকে নতুন অবস্থায় পদার্পণ। সামাজিক পরিবর্তনের গতি সব সমাজে সমান নয়। তবে যে কোনো সমাজে পরিবর্তনের ছোঁয়া সব সময়ই অব্যাহত থাকে। সমাজের কাঠামো এবং বিভিন্ন উপাদান পরিবর্তনের মধ্য দিয়েই সামাজিক পরিবর্তন ঘটে। যেমন যৌথ পরিবার থেকে একক পরিবার, কৃষি অর্থনীতির স্থানে শিল্প ও সেবা নির্ভর অকৃষি অর্থনীতি, স্বল্প শিক্ষার স্থানে ব্যাপকহারে উচ্চ শিক্ষা ইত্যাদি সামাজিক পরিবর্তনের মূল চাবিকাঠি।

সামাজিক পরিবর্তনের সংজ্ঞা (Definition of Social Change)

পরিবর্তন হচ্ছে কোনো কিছু বদলে ফেলা, নতুনকে গ্রহণ করা। সাধারণত পুরাতন বা বিদ্যমান অবস্থা থেকে নতুন অবস্থায় উপনীত হওয়াকে পরিবর্তন বলে। সামাজিক পরিবর্তনের বৈশিষ্ট্য হচ্ছে সনাতন বা ঐতিহ্যবাহী রীতিনীতি বাদ দিয়ে আধুনিক ও সময়োপযোগী রীতিনীতি গ্রহণ ও চর্চা করা। অর্থাৎ কোনো সমাজের অধিকাংশ সদস্য যদি তাদের কিংবা তাদের পূর্বপুরুষের কর্মপন্থা ত্যাগ করে নতুন কার্যক্রমে সম্পৃক্ত হয় তবে তাকে সামাজিক পরিবর্তন বলে। যেমন সনাতন পদ্ধতির চাষাবাদের পরিবর্তে প্রযুক্তিনির্ভর চাষাবাদে অভ্যস্ত হওয়া, ব্যাপক হারে নারী শিক্ষার বিস্তার ইত্যাদি সামাজিক পরিবর্তনের উদাহরণ।

গার্থ ও মিল (Girth and Mill) বলেছেন, সামাজিক পরিবর্তন কথাটি দ্বারা আমরা একটি সামাজিক কাঠামোর অন্তর্ভুক্ত ভূমিকা, আচার-ব্যবস্থায় সময়ভেদে সংঘটিত বিবর্তনের উদ্ভব, বিকাশ ও অবলুপ্তি বুঝিয়ে থাকি। (By social change we refer it whatever may happen in the course of time to the roles, the institutions or the orders comprising a social structure their emergence, growth and decline.) এ সংজ্ঞার আলোকে সামাজিক পরিবর্তন হচ্ছে, সমাজ কাঠামো বা সামাজিক সংগঠনের মধ্যকার রদবদল, একটি অবস্থা থেকে অন্য অবস্থায় রূপান্তর।

সামাজিক পরিবর্তনের সংজ্ঞা দিতে গিয়ে কিংসলে ডেভিস (K. Davis) বলেছেন, সামাজিক পরিবর্তন বলতে বুঝায়, সামাজিক সংগঠন, সমাজ কাঠামো এবং সামাজিক কর্মকাণ্ডে সংঘটিত বিকল্পসমূহ। (By social change is meant only such alternations as occur in social organization that is the structure and function of society.) ডেভিসের মতে, সামাজিক পরিবর্তন সমাজ কাঠামোর সাথে যেমন সম্পৃক্ত, তেমনি সমাজের সংস্কৃতির সাথেও এর নিবিড় সম্পর্ক রয়েছে। তিনি মনে করেন, শিল্প, বিজ্ঞান, প্রযুক্তি, দর্শনসহ সংস্কৃতির যেকোনো শাখাই সামাজিক পরিবর্তনকে ত্বরান্বিত বা প্রভাবিত করতে পারে।


সমাজবিজ্ঞানী জিন্সবার্গ (M. Ginsberg) সামাজিক পরিবর্তন বলতে সমাজ কাঠামোর পরিবর্তনকে বুঝিয়েছেন (By social change I understand change in social structure.) তাঁর মতে, সমাজ মূলত দু'ভাবে এর পরিবর্তনকে নির্দেশ করে। প্রথমত, সামাজিক কাঠামো এবং এর সাথে সংশ্লিষ্ট কার্যাবলির পরিবর্তন। দ্বিতীয়ত, যেসব আদর্শ, মূল্যবোধ এবং বিধিবিধান সামাজিক কাঠামোকে সংহত করে এবং এর বিভিন্ন অংশের মধ্যে ভারসাম্য বজায় রাখে সেগুলোর পরিবর্তন।

বস্তুত সামাজিক পরিবর্তন সমাজের অধিকাংশ মানুষ, তাদের জীবন-জীবিকা, মূল্যবোধ, আচরণবিধি, কার্যক্রম এমনকি

রুচি, মনোভাব এবং ব্যক্তিত্বকেও প্রভাবিত করে। তাই এ পরিবর্তন সামাজিক কাঠামোকে যেমন স্পর্শ করে, তেমনি সামাজিক আচার-প্রথা, রীতিনীতি তথা সংস্কৃতিকেও স্পর্শ করে। তবে ভৌগোলিক, প্রাকৃতিক বা প্রযুক্তিগত পরিবর্তন সামাজিক পরিবর্তন নয়। যদিও এসব পরিবর্তন সামাজিক পরিবর্তনকে প্রভাবিত করতে পারে। এ দৃষ্টিকোণ থেকে সামাজিক পরিবর্তন বলতে যা বুঝায় তা হল:

১. মানুষের জীবন প্রণালীর পরিবর্তন;
২. বিভিন্ন প্রতিষ্ঠান ও সংস্থার কাঠামোগত এবং ক্রিয়াগত পরিবর্তন;
৩. উৎপাদন পদ্ধতির পরিবর্তন;
৪. সামাজিক সম্পর্কের পরিবর্তন;
৫. মূল্যবোধের পরিবর্তন।

সুতরাং সামাজিক পরিবর্তন হচ্ছে সমাজ কাঠামোগত তথা সামাজিক প্রতিষ্ঠান, সংস্থা, সংঘ, সমিতি এবং সংস্কৃতি, আচার-প্রথা, মূল্যবোধ, জীবন যাপন প্রণালীর ক্ষণস্থায়ী কিংবা দীর্ঘস্থায়ী পরিবর্তন। এ পরিবর্তন ইতিবাচক হতে পারে, আবার নেতিবাচকও হতে পারে।

 শিক্ষার্থীর কাজ সময় : ৫ মিনিট		নিচের তালিকা থেকে টিক চিহ্নের (√) মাধ্যমে সামাজিক পরিবর্তনকে চিহ্নিত করুন।			
১) জলবায়ুর পরিবর্তন	২) পেশাগত পরিবর্তন	৩) শিক্ষার হার বৃদ্ধি	৪) মাথাপিছু আয় বৃদ্ধি		
৫) নদীর নাব্যতা সংকট	৬) যানজট	৭) জনসংখ্যা বৃদ্ধি	৮) সামাজিক বনায়ন		
৯) তথ্য ও যোগাযোগ প্রযুক্তির বিকাশ	১০) সচেতনতা বৃদ্ধি	১১) গণতন্ত্র			

সারসংক্ষেপ

বর্তমান সমাজ পরিবর্তনের ফল। আদিম গুহাবাসী মানুষ পরিবর্তনের মাধ্যমে আজ উন্নত নগর-জীবনের অধিকারী। শিক্ষা, পেশা, সামাজিক সম্পর্ক, রীতিনীতি, আইন-কানুন প্রতিটি ক্ষেত্রেই পরিবর্তনের ধারা অব্যাহত রয়েছে। প্রযুক্তির উৎকর্ষ সামাজিক পরিবর্তনকে আরো ত্বরান্বিত করেছে। কৃষি থেকে শিল্প, শিল্প থেকে সেবাখাতের বিস্তার হচ্ছে। যৌথ পরিবার থেকে একক পরিবারও অনিবার্য সামাজিক পরিবর্তনের উজ্জ্বল দৃষ্টান্ত। সমাজের প্রচলিত ব্যবস্থার পরিবর্তে নতুন ব্যবস্থায় রূপান্তরিত হওয়ার উল্লিখিত দৃষ্টান্তসমূহই সামাজিক পরিবর্তনকে নির্দেশ করে।

পাঠ্যোত্তর মূল্যায়ন-১৪.১

সঠিক উত্তরের পাশে টিক (√) চিহ্ন দিন

- ১। “সামাজিক পরিবর্তন হচ্ছে সমাজ কাঠামোর পরিবর্তন” কে বলেছেন?

(ক) কিংসলে ডেভিস	(খ) মরিস জিন্সবার্গ
(গ) গার্থ ও মিলস	(ঘ) নাজমুল করিম
- ২। কার মতে, সামাজিক পরিবর্তন সাংস্কৃতিক পরিবর্তনের সাথেও সম্পর্কিত?

(ক) কিংসলে ডেভিস	(খ) মরিস জিন্সবার্গ
(গ) গার্থ ও মিলস	(ঘ) নাজমুল করিম

পাঠ-১৪.২ সামাজিক পরিবর্তনের কারণসমূহ Causes of Social Change



উদ্দেশ্য

এই পাঠ অধ্যয়ন শেষে আপনি-

- সামাজিক পরিবর্তনের কারণসমূহ আলোচনা করতে পারবেন।



মুখ্য শব্দ

সামাজিক পরিবর্তনের কারণ।



মৌলিক ধারণা (Basic Concept)

পরিবর্তনশীলতা সমাজের অনিবার্য এক বাস্তবতা। কিন্তু কোনো সমাজই স্বয়ংক্রিয়ভাবে পরিবর্তিত হয় না। পরিবর্তনের সুনির্দিষ্ট কারণ থাকে। যেমন, শিক্ষার হার বৃদ্ধি পেলে সমাজ উন্নত হয়। এখানে সামাজিক পরিবর্তনের অন্যতম কারণ হচ্ছে শিক্ষা। দরিদ্রতা শিক্ষা অর্জনের বড় বাধা। আবার নিরক্ষরতা দরিদ্রতা বৃদ্ধি করে। বস্তুত এরূপ নানা কারণ ও আন্তঃসম্পর্কের ফলেই সামাজিক পরিবর্তন ত্বরান্বিত হয়।

সামাজিক পরিবর্তনের কারণসমূহ (Causes of Social Change)

সামাজিক পরিবর্তন হচ্ছে সমাজের রূপান্তর বা রদবদল। সমাজের এ পরিবর্তন, রূপান্তর বা রদবদলের কতগুলো কারণ রয়েছে। যেমন :

- ১. ভৌগোলিক কারণ:** ভৌগোলিক পরিবেশ ও ভৌগোলিক অবস্থা আর্থ-সামাজিক পরিবর্তনে গুরুত্বপূর্ণ ভূমিকা রাখে। অনুকূল ভৌগোলিক পরিবেশে সভ্যতা বিকশিত হয়েছে। ভৌগোলিক ও জলবায়ুর পরিবর্তনে সামাজিক পরিবর্তন অনিবার্য হয়ে পড়ে। যেমন- কোনো নদী শুকিয়ে গেলে এর তীরবর্তী মৎস্যজীবীদের পেশা পরিবর্তন অনিবার্য হয়ে পড়ে। নদী ভাঙন বা ক্রমবর্ধমান জলবায়ুর পরির্তন নগর-স্থানান্তরকে (Urban Migration) উৎসাহিত করে।
- ২. আন্দোলন:** সামাজিক পরিবর্তনের অন্যতম হাতিয়ার হচ্ছে আন্দোলন বা বিপ্লব। সামাজিক আন্দোলনের মধ্য দিয়েই সতীদাহ প্রথা রদ, বিধবা বিবাহের প্রচলন, নারী শিক্ষা, চিরস্থায়ী বন্দোবস্ত আইন বিলোপ ইত্যাদি সংস্কার সাধিত হয়েছে। ফরাসি বিপ্লব, রুশ বিপ্লব সমাজের উৎপাদন ব্যবস্থা, শ্রেণি ও সামাজিক স্তরবিন্যাসের আমূল পরিবর্তন করেছে। গণতন্ত্র, সুশাসন, মানবাধিকার, নারীর সমতা (জেন্ডার), পরিবেশ, দুর্নীতি ইত্যাদি বিষয়ে আন্দোলন মানুষকে অধিকার সচেতন করে যা সামাজিক পরিবর্তনকে ত্বরান্বিত করেছে।
- ৩. উৎপাদন ব্যবস্থা:** দীর্ঘমেয়াদে সমাজের দৃশ্যমান পরিবর্তন সাধনে উৎপাদন ব্যবস্থার ভূমিকা সবচেয়ে বেশি। দাস নির্ভর উৎপাদন ব্যবস্থা হতে সামন্ত উৎপাদন ব্যবস্থায় উত্তরণের মাধ্যমে ব্যাপক সামাজিক পরিবর্তন সংঘটিত হয়েছিল। একইভাবে সামন্তবাদী উৎপাদন ব্যবস্থা থেকে পুঁজিবাদী উৎপাদন ব্যবস্থায় উত্তরণের মাধ্যমেও সমাজের আমূল পরিবর্তন হয়েছে। কৃষিভিত্তিক উৎপাদন ব্যবস্থা গ্রামীণ সমাজের বৈশিষ্ট্য। কিন্তু শিল্পোৎপাদন এবং সেবাখাত নগর সমাজের বৈশিষ্ট্য। কোনো সমাজে ব্যাপকভাবে শিল্পায়ন হলে সেখানে নগরায়ন ত্বরান্বিত হয়। ফলে সমাজ সনাতন ব্যবস্থা থেকে আধুনিকায়নের দিকে অগ্রসর হয়।
- ৪. শিক্ষা:** সামাজিক পরিবর্তনের এক গুরুত্বপূর্ণ হাতিয়ার হচ্ছে শিক্ষা। অজ্ঞতা, অন্ধত্ব, কুসংস্কার ইত্যাদি হতে মুক্তি দিয়ে শিক্ষাই মানুষকে সমাজোপযোগী করে তোলে। এ জন্য শিক্ষা সামাজিকীকরণের প্রধান মাধ্যম। শিক্ষা একটা সমাজ ও সংস্কৃতিকে নতুনভাবে চেলে সাজাতে পারে। শিক্ষা মানুষের পেশা, রুচি, আচার-আচরণ, মূল্যবোধ এবং আর্থিক সক্ষমতায় ইতিবাচক পরিবর্তন আনে।
- ৫. সরকার ও রাজনীতি:** সামাজিক পরিবর্তনে সরকার ও রাজনীতি অত্যন্ত গুরুত্বপূর্ণ দুটি প্রত্যয়। ভারতীয় সামাজিক পরিবর্তনে কংগ্রেস এবং মুসলিম লীগের ভূমিকা সর্বজনস্বীকৃত। বাংলাদেশের সামাজিক পরিবর্তনে ক্ষমতাসীন রাজনৈতিক দলের ভূমিকা অনস্বীকার্য। রাজনীতি ও রাষ্ট্রীয় প্রশাসনে ধর্মনিরপেক্ষতা কিংবা ধর্মীয় মৌলবাদ, প্রগতিশীলতা

কিংবা সাম্প্রদায়িকতা সমাজকেও ভীষণভাবে প্রভাবিত করে। গণতান্ত্রিক সরকার এবং সামরিক সরকারের শাসনামলে সমাজে অনেক পার্থক্য ও পরিবর্তন পরিলক্ষিত হয়। ধর্মীয় মৌলবাদী আদর্শের রক্ষণশীল সরকার ও প্রগতিশীল সরকারের শাসনামলেও সমাজের স্বাভাবিক ধারার পরিবর্তন পরিলক্ষিত হয়।


৬. ধর্মীয় চেতনা: ধর্মীয় চেতনার যৌক্তিকতার বিকাশ সমাজ পরিবর্তনের অন্যতম নিয়ামক। সমাজে যখন নানারকম অনাচার, অসামাজিকতা বৃদ্ধি পায় তখন ধর্মীয় চেতনা ও আদর্শ সুস্থ সামাজিক পরিবেশ ফিরিয়ে আনতে পারে। মুহাম্মদ (সা), যীশুখ্রিস্ট, গৌতম বুদ্ধ প্রমুখ ধর্মীয় চেতনা ও আদর্শের মাধ্যমে ব্যাপকভাবে সামাজিক পরিবর্তন সংঘটনে সক্ষম হয়েছিলেন।

৭. প্রচার-প্রচারণা: কোনো নির্দিষ্ট বিষয়কে সামনে রেখে ব্যাপক প্রচার-প্রচারণা চালানো হলে সচেতনতা সৃষ্টির পাশাপাশি সামাজিক পরিবর্তনও অনিবার্য হয়ে পড়ে। স্বদেশী আন্দোলনের মধ্য দিয়ে বিদেশী পণ্য বর্জন করে দেশীয়পণ্য উৎপাদন ও ব্যবহার ব্রিটিশ ভারতের সমাজে দৃশ্যমান পরিবর্তন এনেছিল। বাংলা ভাষার জন্য আন্দোলন, ছয় দফা আন্দোলন, মুক্তিযুদ্ধের চেতনা বিষয়ে বহুমুখী প্রচারণার ফলে সমাজের নেতৃত্ব, ক্ষমতা কাঠামো ইত্যাদি ক্ষেত্রে পরিবর্তন এসেছে। বাল্যবিবাহ, মৌতুকপ্রথা, পরিবার পরিকল্পনা ইত্যাদি বিষয়ে প্রচারণাও সামাজিক পরিবর্তনকে ত্বরান্বিত করে।

৮. গণমাধ্যম: আধুনিক সমাজের অনিবার্য উপাদান হচ্ছে গণমাধ্যম। পত্র-পত্রিকা, টেলিভিশন, বেতার, ইন্টারনেটভিত্তিক সামাজিক যোগাযোগ মাধ্যম, মোবাইল ফোন প্রভৃতি বিরাট সংখ্যক মানুষের সাথে যোগাযোগ ও সম্পর্ক স্থাপনে সক্ষম। সামাজিক পরিবর্তনে গণমাধ্যমের বিশেষ ভূমিকা রয়েছে। গণমাধ্যম জনমত গঠন এবং সামাজিক আন্দোলনকে ত্বরান্বিত করতে পারে। কোনো নির্দিষ্ট বিষয়ে মানুষকে সচেতন করে তুলতে পারে। সন্ত্রাস, দুর্নীতি, পরিবেশ, স্বাস্থ্য, শিক্ষা ইত্যাদি বিষয়ে গণমাধ্যম পরিবর্তন আনয়নে ইতিবাচক ভূমিকা রাখতে পারে।

৯. উন্নত যোগাযোগ ব্যবস্থা: যোগাযোগ ব্যবস্থাকে সামাজিক পরিবর্তনের পূর্বশর্ত বলা যেতে পারে। ভাষাগত কিংবা অবকাঠামোগত যোগাযোগ ব্যবস্থা যখন খুব অনুন্নত ছিল তখন সমাজও ছিল বদ্ধ, স্থির এবং অনগ্রসর। কিন্তু যোগাযোগ ব্যবস্থা যত উন্নত হয়েছে সামাজিক পরিবর্তনও তত দ্রুততর হয়েছে। গ্রামের সাথে শহরের সড়ক, রেল বা জলপথের যোগাযোগ নিশ্চিত হলে গ্রামের আর্থ-সামাজিক অবস্থার পরিবর্তন হতে বাধ্য। উত্তরবঙ্গে মঙ্গা নিরসনে বঙ্গবন্ধু যমুনা সেতুর ভূমিকা অনস্বীকার্য। টেলিফোন, ফ্যাক্স, ইন্টারনেট, মোবাইল ফোন ইত্যাদি যোগাযোগ ব্যবস্থা সমাজ জীবনে ব্যাপক পরিবর্তনের সূচনা করে।

১০. বিজ্ঞান ও প্রযুক্তির উন্নয়ন: ঐতিহ্যবাহী সমাজ থেকে আধুনিক সমাজে উত্তরণে বিজ্ঞান ও প্রযুক্তির অবদান সর্বাধিক। বাস্পীয় ইঞ্জিন থেকে আজকের তথ্য ও যোগাযোগ প্রযুক্তি সামাজিক পরিবর্তনে গুরুত্বপূর্ণ ভূমিকা রেখেছে। আর্থ-সামাজিক উন্নয়ন, উৎপাদন পদ্ধতির পরিবর্তন, সামাজিক সম্পর্ক ও শ্রেণি, পেশা ইত্যাদি ক্ষেত্রে বিজ্ঞান ও প্রযুক্তির প্রভাব অনস্বীকার্য।

 শিক্ষার্থীর কাজ	সামাজিক পরিবর্তনের কারণসমূহ চিহ্নিত করুন।	সময় : ৫ মিনিট
---	---	----------------

সারসংক্ষেপ

সমাজের পরিবর্তন যেমন অনিবার্য, স্বাশ্বত, তেমনি কাঙ্ক্ষিতও। তবে এ পরিবর্তন আপনা-আপনি হয় না। পরিবর্তনের পিছনের কিছু কারণ সক্রিয় থাকে। ভৌগোলিক কারণে যেমন সামাজিক পরিবর্তন হয়, তেমনি অর্থনৈতিক (উৎপাদন ব্যবস্থা), রাজনৈতিক (সরকার, দল, আদর্শ), সামাজিক ও সাংস্কৃতিক কারণেও সমাজের পরিবর্তন সংঘটিত হয়। প্রযুক্তির বিপ্লব ও ব্যবহার সমাজের পরিবর্তনকে ত্বরান্বিত করে। গণমাধ্যম, প্রচারণা এমনকি আধুনিক সামাজিক যোগাযোগ মাধ্যমও সামাজিক পরিবর্তনে গুরুত্বপূর্ণ ভূমিকা রাখে।



পাঠোত্তর মূল্যায়ন-১৪.২

সঠিক উত্তরের পাশে টিক (✓) চিহ্ন দিন

- ১। নিচের কোনটি সামাজিক পরিবর্তনের কারণ হিসেবে বিবেচিত হয়?
 - (ক) প্রাকৃতিক দুর্যোগ
 - (খ) জলবায়ুর পরিবর্তন
 - (গ) উৎপাদন ব্যবস্থা
 - (ঘ) খ ও গ উভয়
- ২। সামাজিক পরিবর্তনের আধুনিক উপাদান কোনটি?
 - (ক) শিক্ষা
 - (খ) আন্দোলন
 - (গ) গণমাধ্যম
 - (ঘ) তথ্য ও যোগাযোগ প্রযুক্তি

পাঠ-১৪.৩ সামাজিক পরিবর্তনের প্রভাব Impact of Social Change



উদ্দেশ্য

এই পাঠ অধ্যয়ন শেষে আপনি-

- সামাজিক পরিবর্তনের প্রভাব ব্যাখ্যা করতে পারবেন।



মুখ্য শব্দ

সামাজিক পরিবর্তনের প্রভাব।



মৌলিক ধারণা (Basic Concept)

নানা কারণে সামাজিক পরিবর্তন সংঘটিত হয়। এদিক থেকে সামাজিক পরিবর্তন প্রত্যয়টি নিজেই বিভিন্ন কারণ বা ঘটনার ফল বা প্রভাব। যেমন আধুনিক তথ্য ও যোগাযোগ প্রযুক্তির সহজলভ্যতার কারণে মানুষের মধ্যে সচেতনতা ও মুক্তবুদ্ধির চর্চা বৃদ্ধি পাচ্ছে। অর্থাৎ আধুনিক তথ্য ও যোগাযোগ প্রযুক্তির ফল বা প্রভাব হচ্ছে মানুষের ভাবনার জগতে পরিবর্তন যা সামাজিক পরিবর্তনে অবদান রাখছে। তবে আমাদের মনে রাখতে হবে, সামাজিক পরিবর্তন একটি ব্যাপক প্রত্যয়। সামাজিক পরিবর্তন মূলত সমাজের কাঠামো এবং এর উপাদানসমূহের বিদ্যমান অবস্থার রদবদল। বিশেষ করে আমাদের মত উন্নয়নশীল দেশে সামাজিক পরিবর্তনের প্রভাব অনেক ব্যাপক এবং সুদূরপ্রসারী।

সামাজিক পরিবর্তনের প্রভাবসমূহ (Impact of Social Change)

সামাজিক পরিবর্তনের প্রভাবকে দুইভাবে বিবেচনা করা যায়। প্রথমত সামাজিক পরিবর্তনের ইতিবাচক প্রভাব; দ্বিতীয়ত এর নেতিবাচক প্রভাব। এখানে সামাজিক পরিবর্তনের প্রভাব সম্পর্কে আলোচনা করা হল:

ইতিবাচক প্রভাব

১. শিক্ষা ও সংস্কৃতির প্রভাব: সামাজিক পরিবর্তনের ফলে শিক্ষা ও সংস্কৃতিতে ব্যাপক প্রভাব পড়ে। মানুষ এখন আগের থেকে অনেক সচেতন। ধনী-দরিদ্র, শহর-গ্রাম সবাই তাদের ছেলেমেয়েদেরকে স্কুলে পাঠায়। ফলে সমাজে শিক্ষিত জনগোষ্ঠীর হার বৃদ্ধি পাচ্ছে। মানুষ ঐতিহ্যবাহী সংস্কৃতির পরিবর্তে আধুনিক সংস্কৃতিতে অভ্যস্ত হয়ে উঠছে। মানুষ আগের তুলনায় অনেক বেশি বিজ্ঞানমনস্ক, যুক্তিবাদী হয়েছে। সামগ্রিকভাবে মানুষ অনেক বেশি সক্ষমতা অর্জন করেছে।

২. মানুষের জীবন ধারা : সামাজিক পরিবর্তনের ফলে জ্ঞান বিজ্ঞানের নিত্যনতুন আবিষ্কার ও প্রযুক্তির বিভিন্নমুখী ব্যবহারের প্রসার বেড়েছে। ফলে মানবজীবন হয়ে উঠেছে গতিশীল, সহজ ও শান্তিপূর্ণ।

৩. মর্যাদা: শিক্ষা, জ্ঞান ও অর্থনৈতিক মানদণ্ডে সমাজে নাগরিকের মর্যাদা নির্ণীত হচ্ছে যা পূর্বে বংশ মর্যাদার ভিত্তিতে নির্ণীত হত। বিভিন্ন শ্রেণি, পদমর্যাদা, ক্ষমতা কাঠামো ইত্যাদি ক্ষেত্রে পরিবর্তনের দৃশ্যমান প্রভাব রয়েছে।

৪. নগর-সংস্কৃতির বিস্তার: বিভিন্ন গণমাধ্যম বিশেষ করে, টিভি, মোবাইলফোন, ইন্টারনেট, নগরায়ন নগর-সংস্কৃতির বিস্তারে বিশেষ ভূমিকা রাখছে। ফলে মানুষ আরও বেশি আধুনিক, বাস্তববাদী ও সচেতন হয়ে উঠছে।

৫. আধুনিকতার বিস্তার: সামাজিক পরিবর্তনের ফলে মানুষের আচার-আচরণ, ধ্যান-ধারণা, মূল্যবোধ, আদর্শ, রীতিনীতি, জীবনবোধসহ বিভিন্ন ক্ষেত্রে আধুনিক রূপ পরিগ্রহ করছে।

নেতিবাচক প্রভাবসমূহ


১. অপরাধ প্রবণতা: বিদেশি অপসংস্কৃতি, উগ্রতা, পর্ণোগ্রাফি আমাদের সনাতন সামাজিক মূল্যবোধে পরিবর্তন আনছে।

ফলে কিশোর অপরাধ এবং যৌন অপরাধ প্রবণতা বাড়ছে। যুব সমাজ বিভ্রান্ত হয়ে সমাজ বিরোধী নানাবিধ কাজে লিপ্ত হচ্ছে।

২. অপরিকল্পিত নগরায়ন ও নগর দারিদ্র্য: আধুনিক সামাজিক পরিবর্তনের অন্যতম ফল হচ্ছে অপরিকল্পিত নগরায়ন ও নগর দারিদ্র্য। নানা কারণে মানুষ সনাতন ও কৃষি পেশা ছেড়ে কাজের আশায় শহরে ছুটে আসছে। কিন্তু অপরিপূর্ণ শিল্পায়ন ও ছুটে আসা মানুষের অদক্ষতার কারণে অনেকে প্রত্যাশিত কাজের সুযোগ পায় না। ফলে বস্তি এবং নগর-দারিদ্র্যতা নাগরিক জীবনের স্বস্তি ও শান্তি কেড়ে নিচ্ছে।

৪. গ্রামীণ ঐতিহ্য হারিয়ে যাচ্ছে : সামাজিক পরিবর্তনের ফলে গ্রামীণ জীবনে অনেক বৈচিত্র্য এসেছে। তাদের পেশা, আয়-উপার্জন, শিক্ষা-সচেতনতায় যেমন পরিবর্তন এসেছে তেমনি জ্ঞাতি সম্পর্ক, সনাতন বিনিময় প্রথা ইত্যাদি দুর্বল হয়ে পড়ছে।

৫. যৌথ পরিবারে ভাঙ্গন: শিল্পায়ন ও নগরায়নের ফলে একক পরিবারের সৃষ্টি হয়ে যৌথ পরিবার ব্যবস্থা ক্রমশ ভেঙ্গে যাচ্ছে। ফলে শিশু, নারী, বয়স্ক, প্রতিবন্ধীসহ নির্ভরশীল সদস্যদের সামাজিক ও অর্থনৈতিক নিরাপত্তাহীনতা তৈরি হচ্ছে। পরিবারের ভাঙ্গনে সামাজিক নিরাপত্তাবলয় ক্রমশ ভেঙ্গে পড়ছে। পারিবারিক সম্পর্কে শিথিলতার ফলে বিবাহ বিচ্ছেদ, বিবাহ বহির্ভূত সম্পর্ক, পরিবারের অমতে নিজ পছন্দে বিয়ে, কিশোর অপরাধ ইত্যাদি সমস্যা ক্রমশ তীব্র থেকে তীব্রতর হচ্ছে।

	শিক্ষার্থীর কাজ	সামাজিক পরিবর্তনের প্রভাবসমূহ চিহ্নিত করুন।	সময় : ৫ মিনিট
---	------------------------	---	-----------------------

সারসংক্ষেপ

প্রযুক্তির উৎকর্ষ, নগরায়ন, শিল্পায়ন ও উৎপাদন প্রক্রিয়ায় পরিবর্তন ও আধুনিকীকরণের কারণে সমাজ পরিবর্তিত হচ্ছে। এ পরিবর্তন সমাজের বিভিন্ন ক্ষেত্রে ক্ষণস্থায়ী কিংবা দীর্ঘস্থায়ী প্রভাব বিস্তার করে। এ প্রভাব ইতিবাচক হতে পারে, আবার নেতিবাচকও হতে পারে। ইতিবাচক প্রভাবে শিক্ষা, সচেতনতা ও জীবনমানের উন্নয়ন সাধিত হয়। মানুষ আধুনিক ও বিজ্ঞানমনস্ক হয়ে ওঠে। নগর জীবনের নানা বৈশিষ্ট্য মানব সমাজকে অনেক বেশি গতিশীল করে। নেতিবাচক প্রভাবে নানা ধরনের অপরাধ প্রবণতা বৃদ্ধি পায়, সেই সাথে অপরিকল্পিত নগরায়ন, নগর দারিদ্র্য, ঐতিহ্যবাহী সংস্কৃতি ও মূল্যবোধের অবক্ষয়, যৌথ পরিবারে ভাঙ্গন ইত্যাদি। এসব প্রভাবও সামাজিক পরিবর্তনের অপরিহার্য অংশ।

পাঠোত্তর মূল্যায়ন-১৪.৩

সঠিক উত্তরের পাশে টিক (✓) চিহ্ন দিন

- ১। প্রাথমিকভাবে সামাজিক পরিবর্তনের প্রভাব কয় ধরনের হতে পারে?

(ক) দুই প্রকার	(খ) তিন প্রকার
(গ) চার প্রকার	(ঘ) পাঁচ প্রকার
- ২। নিচের কোনটি সামাজিক পরিবর্তনের প্রভাব?

(ক) গণতান্ত্রিক শাসন ব্যবস্থা	(খ) জলবায়ুর পরিবর্তন
(গ) যৌথ পরিবারে ভাঙ্গন	(ঘ) কৃষি উৎপাদন বৃদ্ধি

উত্তরমালা :

পাঠোত্তর মূল্যায়নের (বহুনির্বাচনী প্রশ্ন) উত্তরমালা

পাঠোত্তর মূল্যায়ন-১৪.১	ঃ	১। খ	২। ক
পাঠোত্তর মূল্যায়ন-১৪.২	ঃ	১। ঘ	২। ঘ
পাঠোত্তর মূল্যায়ন-১৪.৩	ঃ	১। ক	২। গ
চূড়ান্ত মূল্যায়ন	ঃ	১। ঘ	২। খ
			৩। গ
			৪। ক



চূড়ান্ত মূল্যায়ন

সৃজনশীল (কাঠামোবদ্ধ) প্রশ্ন

১। নিচের উদ্দীপকটি পড়ুন এবং প্রশ্নগুলোর উত্তর দিন।

মিসেস স্বপ্না শহরে বসবাস করেন। প্রায় দশ বছর পর তিনি গ্রামে বেড়াতে এলেন। গ্রাম দেখে তিনি অনেকটা অবাক। কাঁচা রাস্তা পাকা হয়েছে। প্রতিটি বাড়িতে বিদ্যুতের আলো। প্রায় সবারই ফ্রিজ, টেলিভিশন, মোবাইল ফোন আছে। গ্রামের অনেকগুলো বাড়িতে পাকাঘর তৈরি হয়েছে। ছোনের ঘরের জায়গায় এসেছে টিনের ঘর। স্বাস্থ্য, চেহারা এবং পোশাক-পরিচ্ছদেও সবার একটি পরিপাটি ভাব। প্রায় সবাই স্কুল-কলেজে যায়। অনেকেই কৃষিকাজ ছেড়ে ব্যবসা-চাকরি-আত্মকর্মসংস্থানে যুক্ত হয়েছেন। খোঁজ নিয়ে জানলেন, গ্রামের বেশকিছু মেয়ে কলেজেও পড়াশোনা করে। এ গ্রামের মেয়েদের এখন আর বাল্যবিবাহ হয় না।

- | | |
|--|---|
| (ক) সামাজিক পরিবর্তন কী? | ১ |
| (খ) সামাজিক পরিবর্তনের চারটি উদাহরণ লিখুন। | ২ |
| (গ) সামাজিক পরিবর্তনের কারণগুলো কি কি? | ৩ |
| (ঘ) সমাজে সামাজিক পরিবর্তনের প্রভাব ব্যাখ্যা করুন। | ৪ |

২। নিচের উদ্দীপকটি পড়ুন এবং প্রশ্নগুলোর উত্তর দিন।

প্রাজ্ঞ তার দাদুর বাড়িতে বেড়াতে গেছে। রাতে দাদুর কাছে সে গল্প শুনতে চাইল। দাদু তার শৈশবের কথা শোনালেন। তখন, গ্রামে বিদ্যুৎ ছিল না, টিভি, ফ্রিজ মোবাইল ফোনের নাম মানুষ জানত না। অধিকাংশ পরিবার ছিল বেশ বড়। সেখানে বাবা-মা ছাড়াও দাদা-দাদি, চাচা-চাচি, চাচাতো ভাই-বোন সবাই একত্রে বসবাস করত। পাড়া-প্রতিবেশী, জ্ঞাতি-গোষ্ঠী একে অপরকে সহযোগিতা করত। তখন গ্রামে কোনো রাস্তা ছিল না। মানুষ হেঁটে, নৌকায় কিংবা পাঙ্কিতে করে চলাফেরা করত। শহরের সাথে গ্রামের তেমন যোগাযোগ ছিল না। প্রাজ্ঞ দাদুর বাস্তব জীবনের গল্প শুনে অবাক হয়ে গেল।

- | | |
|---|---|
| (ক) উদ্দীপকে দাদুর শৈশব ও প্রৌঢ়ত্বের ব্যবধান আসলে কী? | ১ |
| (খ) সমাজের কোন কোন ক্ষেত্রে পরিবর্তন পরিলক্ষিত হয়? | ২ |
| (গ) সামাজিক পরিবর্তনের কারণগুলো লিখুন। | ৩ |
| (ঘ) সামাজিক পরিবর্তন সমাজকে কীভাবে প্রভাবিত করে- ব্যাখ্যা করুন। | ৪ |